

## **Sikũn Ximotre** **Pawre kot Ximotre hwỳr wam** **kagà nẽ mẽn̄h kõt hõ mẽn̄h**

Pawre na pre kagàja nhĩpêx. Na pre Jejus kwỳ h̄kêt xwỳnhjaja Jejus ã unê nẽ krĩ pẽ Rõm kamã haxà nhũm arĩ hkrĩ ho hkrĩ. Tã ra mẽ kot hpĩr kaxyw nhũm Ximotre mã kagàja nhĩpêx nẽ hwỳr kumẽ. Na pre Ximotre Pawre h̄kõt pa ho pa hã mytwrỳ xohtô nẽ. Tã hpãnhã krĩ pẽ Epes kamã arĩk nẽ Tĩrtũm kapẽr o Jejus kõt hkwỳjê jahkre ho ri mẽ h̄kõt pa. Jakamã nhũm Pawre kagàja nhĩpêx nẽ kamã kãm mẽmoj tã karõ nẽ hwỳr kumẽ. Nẽ nhỹrmã mẽ kot Pawre pyrà nẽ Jejus ã hpĩr mã htã tee ri amnhĩ kukamã hamaxpẽr kêt ã kãm karõ.

Nẽ mẽ hkwỳjaja kęp Tĩrtũm kra hã amnhĩ jarẽnh tã nhũm Pawre Tĩrtũm kãm hprãm xà kuhpa hã mẽ kot tanhmã amnhĩ nhĩpêx to ho pa hã Ximotre mã mẽ harẽ. Kot mẽ harẽnh mar nẽ Jejus kwỳjê nẽ mẽ omunh mex o pa kaxyw. Nẽ Ximotre kot Tĩrtũm kãm hprãm xà kot pix mã amnhĩ nhĩpêx o pa hã kãm karõ. ã na pre Pawreja Ximotre mã mẽmoj tã karõ kamã hihtỳx nẽ hã kagà nẽ hwỳr mẽnh anẽ. Nẽ kãm:

<sup>1</sup> Pa Ximotre? Xà amex? Ixpê Pawre na pa amã ixkapẽr nẽ hã kagà nẽ awỳr kumẽ. Ixpê Jejus nhỹ hã hkwỳjê jahkre ho ixpa xwỳnh na pa. Tĩrtũm na pre ja kaxyw ixãm. Tĩrtũm Kra Jejus Krisja kot puj mẽ pahpẽ hkwỳjaja nhỹrmã kukwak ri pamex kumrẽx nẽ pahĩr tũm nẽ ri papa ho papa.

*Pawre kot Ximotre ho Tirtũm mẽ Jejus wa hwỳr ã harẽnh*

*Atre 16.1-2*

<sup>2-3</sup>Te apê ixkra pyræk Ximotre. Jakamã na pa hte ato Mẽpanhĩpêêxà maati Tirtũm mẽ Pahihiti Jejus Kris wa hwỳr rãhã ho ri ixpa. Na pa hte mẽ pakukamã mẽ panhĩgêt pyrà nẽ tãm ijamaxpêr o ixpa pê Tirtũm mã tanhmã amnhĩ nhĩpêx to ho ri ixpa. Jakamã na pa hte ato Kra Jejus mẽ wa hwỳr rãhã ho ri ixpa. Arĩgro hã nẽ kamát kãm amã ijamaxpêr nẽ ato wa kuwỳ nẽ wa kãm:

—Pa Tirtũm mẽ Pahihiti wa. E ixte ixkra puro Ximotre ho war awỳr kaxyw war amã ijamaxpêr. Na ka hte wa ho mex nhũm war akôt amnhĩ nhĩpêx mex o pa. Te õ wôwô mẽ katorxà wa kot amnhĩ nhĩpêx pyræk. Na pa hte kot amnhĩ nhĩpêx o paja mã ijamaxpêr nẽ ÿ hã ixkĩnh nẽ. War ate kamã axukaprĩ ho ri apa kaxyw na pa ho war awỳ. War ate kutã war anojarêt rãhã ho ri war apa nhũm hamakêtkati nẽ àmnhĩx ri pa ho pa kaxyw. Anẽ.

*Pawre kot Ximotre nhỹ hã hkĩnh ã harẽnh*

<sup>4</sup>Nẽ na ka pre hte ixkôt ixto ajuta ho ri ixkôt apa htã pa pre nhỹhỹm inhnojarêt nẽ axtem axàpênh õ hã amã karõ hãmri nẽ Epes kamã are nẽ ma mõ. Ka amã ijapê xàj tee ri ma inhmõr ã ixpumu nẽ amỳr rax nẽ. Na pa hte arĩ ja hã inhnohtỳx nẽ ri ho ixpa Ximotre. Jao ra ato ama nẽ. Tã kot puj nhỹrmã axte axpêñ pumu nẽ pahkĩnh tỳx nẽ.

<sup>5</sup>Nẽ na pa hte akatorxà Enĩtre mẽ anhõ wôwôre Rojti wa kãm ijamaxpêr rãhã ho ri ixpa. Na pre wa kumrêx amnhĩ kaxyw Jejus kôt hamaxpêr nẽ hkôt amnhĩ xãm. Tã ka wa hkanrêhã wa uræk nẽ ã amnhĩ nhĩpêx anẽ. Ixte ja hã apumunh mex.

<sup>6</sup> Na pa pre ate tanhmã Jejus mã amnhĩ nhĩpêx to ho ri apa kaxyw axãm kaxyw anhĩmõk ã inhĩhkra xi nê ato Tĩrtũm wỳ. Kot tanhmã akrã hto nhũm ate Karõ nhỹ hã tanhmã amnhĩ nhĩpêx to ho apa kaxyw. Tã kêr ka arĩ ã kãm amnhĩ nhĩpêx anhỹr rãhã ho ri apa.

<sup>7</sup> Na pu htem Tĩrtũm Karõ nhỹ hã pamã ma ho papa hkêt nê. Na pu htem ỹ hã pamã mẽ piitã mẽ hkĩnh pê paxãmnhĩx tanhmã mẽ ho ajuta hto ho papa. Nê ỹ hã kapêr o mẽ ahkre htỳx o ri mẽ hkôt papa. Nê mẽmoj punuj kutã amnhĩ to htỳx rãhã nê. Jao amnhĩ to mex pix nê.

<sup>8</sup> Jakamã kwa kêr ka amã mẽ kãm Jejus jarênh o apa pymaj tee ri amnhĩ kukamã ajamaxpêr kêt nê. Nê mẽ kot Jejus ã ijaxàr nhũm arĩ ixkrĩ hã ijarênh ma nê mẽ kot ixkuxwar ajaxàr pymaj mẽ kãm Tĩrtũm kapêr o mẽ ahkre hkukamã tee ri ajamaxpêr kêt nê. Mẽ kot ã anhĩpêx anhỹr mã tã kêr ka amnhĩ kamã akahak kêt nê. ãm Tĩrtũm nhỹ hã hihtỳx xà ho amnhĩ to htỳx nê ixpyrà nê ma mẽ kãm Jejus kot mẽ panê tanhmã amnhĩ nhĩpêx to hã harênh to rãhã ho ri mẽ hkôt apa. Mẽ kot tanhmã hã anhĩpêx to htãã.

<sup>9</sup> Na pu htem Jejus kôt amnhĩ xunhwỳ nhũm Tĩrtũm ja hã mẽ pahpumu nê Jejus kukwak ri amnhĩ katut kôt mẽ pahte amnhĩ tomnuj piitã rênh pa nê mẽ pahto hkra. Hãmri nê mẽ pahte hkôt pix mã amnhĩ nhĩpêx o papa kaxyw mẽ paxunhwỳ. ãm Jejus pix kukwak ri na hte mẽ pahto hkra nê ã mẽmoj to mẽ pakutã nojarêt rãhã ho pa anê. No na hte mẽ pahte amnhĩ to mex ã mẽ pahpumunh kôt mẽ pahto hkra hkêt nê.

Amnepê m kormã mêmoj piitã hkêt ri na pre mē pakukamã hamaxpêr o:

—Koja mē nhÿrmã Ixkra Jejus Kris kôt amnhÿ xunhwÿ pa ja hã mē omu nē Ixkra kukwak ri mē ho mex nē. Anē.

<sup>10</sup> Tã kormã mē pahte amnhÿ tã ã kot mē pa-jarênh anhÿrja mar kêt jakamã na pre Jejus mē pahwÿr wrÿ nē tanhmã mē pahto mex to. Na pre ty nhÿm Tÿrtÿm akupÿm ho htÿr. Jakamã na pu htem ra amnhÿ kaxyw hkôt pajamaxpêr nē hkôt amnhÿ xunhwÿ hãmri nē nhÿrmã mē pahtyk tã nhÿm Tÿrtÿm kot Kra Jejus nhÿpêx pyrã nē akupÿm mē pahto mē pahtÿr pu mē Jejus kukwak ri wa kuri pamex nē pahtÿr tÿm nē papa ho papa. Jakamã na pu htem mē pamã pahtyk puma ho papa hkêt nē.

<sup>11</sup> Amnepê m na pre Tÿrtÿm ixãm nē tanhmã inhmã ixapênh ã karõ hto nē inhmã:

—E Pawre kêr ka Jejus nhÿ hã ma hkwyjê jahkre ho ri mē hkôt apa. Nē ixkapêr o mē ahkre mex nē. Kêr ka ã amnhÿ nhÿpêx anhÿr rãhã ho ri mē hkôt apa. Anē.

<sup>12</sup> Tã ã kot inhmã kapêr anhÿr nhÿm ixte kapêr kôt amnhÿ nhÿpêx o ixpaja mÿrapê na htem Jejus ã tanhmã inhÿpêx kati hto ho pa. Pa hte ixpunuj nē amnhÿ xã htÿx kamã ijamak o ri Jejus mã tanhmã amnhÿ nhÿpêx to ho ri mē hkôt ixpa. Tã nom tee ri ja hã amnhÿ pumu nē amnhÿ kamã xipijaam nē ixkaprÿ hkêt nē. Ixte amnhÿ kaxyw hkôt ijamaxpêr xwÿnhja na ixte tanhmã kot amnhÿ nhÿpêx to hã omunh mex jakamã kot paj ty nhÿm mē arÿ inhmÿr pê Tÿrtÿm kapêr mar o pa. Mē kot ja hã ixpÿr tã koja mē apê Kris kôt ixkwÿjaja inhmÿr pê arÿ mē kãm harênh o apa. Koja mē ã axpên mÿr pê

amnhĩ nhĩpêx anhÿr o pa rãhã nhũm Pahihti Jejus akupÿn mẽ pahwÿr wrÿ.

<sup>13</sup> Kwa Ximotre. Ra ixte amã mẽmoj tã karõ rax jakamã kêr ka mar tÿx nẽ hkõt amnhĩ nhĩpêx rãhã o ri apa. Jao Jejus Kris nhÿ hã mẽ piitã mẽ noo mã amnhĩ kaxyw kãm ajamxpêr tÿx rãhã nẽ. Nẽ mẽ piitã mẽ ho mex o ri apa.

<sup>14</sup> Ate mẽ kãm tanhmã Jejus jarênh to ho ri apaja ãm hãmri na. Tã koja mẽhõ htÿx ri tanhmã ho kapêr punuj to rÿ axtem nẽ tanhmã harênh to ka ja hã ama nẽ nẽ kãm akapêr kãm axihtÿx nẽ. Tĩrtũm Karõ ra kot akarõ hwÿr àr jakamã kêr ka ÿ hã ã Jejus jarênhja jamãr mex o ri apa anẽ.

*Pawre kot tanhmã amnhĩ jarênh to*

*Sikŭn Ximotre 4.16-18*

<sup>15</sup> Nẽ mãn ka pre ra pika pê As kamã Kris kwÿ kot ixkaga hã mẽ harênh ma. Na pre Pijerti mẽ Emosti mẽ mẽ ohtõ nẽ tanhmã hamaxpêr to nẽ ixto ajuta hkêt nẽ.

<sup>16-18</sup> ãm Onẽsipti pix na pre mẽ kurom ijarênh ma nẽ man ixwÿr Rõm wÿr mõ nẽ ijapêr o ri mẽ hkõt mra nẽ ixwÿr kato. Hãmri nẽ xatã ixwÿr mra nẽ tanhmã ixto mex to. Jao akupÿm ijamxpêr o hihtÿx. Ixpê prês nẽ ixkrĩ htã kêp ixkrãmnhwÿ hã amnhĩ jarênh ã hpijaãm kêt nẽ. Nẽ amnepêm kormã krĩ pê Epes kamã ixpa ri na pre mããnên tanhmã ixto mex to ho pa. Tã ã kot inhĩpêx mex anhÿr o pa jakamã na pa hte ho Pahihti Jejus wÿ nẽ kãm:

—Pa Pahihti? Onẽsipti o na pa awÿ. Kot ixto mex rãhã ho pa jakamã kwa kêr ka ixtã omu nẽ kutã anojarêt rãhã ho apa. Nẽ õrkwÿ kamã hkwÿjaja mããnên tanhmã mẽ ho mex to. Hãmri nẽ nhÿrmã

akupÿn mẽ ixwÿr wry ñe ixtã kamã axukapri hã tanhmã ho mex to. Anẽ.

## 2

*Mẽ pahte Jejus kôt amnhĩ nhĩpêx pix prãm ã mẽ pamã karõ*

*Wam Ximotre 6.11-16*

<sup>1</sup> E Ximotre. Jejus Kris kot mẽmoj to mẽ pakutã nojarêt rãhã jakamã kwa kêr ka ÿ hã amnhĩ to htÿx ñe kãm tanhmã amnhĩ nhĩpêx to ho apa hã amnhĩ kamã akahak o ri apa hkêt ñe.

<sup>2</sup> Ra ate pa tanhmã Tirtũm kapêr o mẽ ahkre htoja mar jakamã kêr ka amnhĩ xõ ri ã Jejus kôt mẽ pahkwÿjê jahkre ho apa anẽ. Mẽ kot amar ñe pahpyràn axpên xõ ri ho axpên jahkre ho pa kaxyw.

<sup>3-4</sup> Sõrdat na htem mẽ hkrãhtũm kãm prãm xà hkôt tanhmã amnhĩ nhĩpêx to. Jao tanhmã kute htã kapêr ma ñe hkôt amnhĩ nhĩpêx. Tanhmãn à rÿ kãm prãm rÿ tanhmã omnuj to htã kutã amnhĩ to htÿx ñe mẽ hkrãhtũm kôt amnhĩ nhĩpêx. Na htem amnhĩ xàpênh kukamã tee ri hamaxpêr o pa hkêt ñe. ãm mẽ hkrãhtũm kapêr kôt pix mã amnhĩ nhĩpêx o pa hprãm. Tã kêr ka mẽ urak ñe Pahihti Jejus kôt amnhĩ nhĩpêx rãhã ho ri apa hprãm. Mẽ kot hã tanhmã atomnuj to htãã.

<sup>5</sup> Nẽ mẽ hprõt tÿx xwÿnhjaja na htem hkwÿjê pẽ amnhĩ to wa hprãm xaj ãm ja pix kukamã hamaxpêr. Hãmri ñe hprõt tÿx prãm xaj mẽmoj kot mẽ ho hirerek kêt ñe amnhĩ jagri htÿx ñe. Hãmri ñe hprõt tÿx o hkwÿjê jakre ñe amnhĩ to wa ñe pøj ñe kot amnhĩ to wa hã mẽmoj to kãnja. Tã kêr ka mẽ

uràk nē amã Pahihti Jejus kot amnhĩ nhĩpêx kôt pix mã amã amnhĩ nhĩpêx prãm.

<sup>6</sup> Nē pur kãm mẽ àpênh xwýnhjaja na htem mẽ hpur kãm àpênh pix tânopxar o pa nē àpênh rũnh nē. Kãm kaga hkêt kãm àpênh o pa. Tã àpênh rũnhja kukwak ri ihpur kãm õ rũnh nē ho apkur mex o pa. Nom koja mẽ kãm kaga nē àpênh mex kêt nē hãmri nē õ grire nē apkur mex kêt nē. Tã kêt ka pur kãm mẽ àpênh rũnh xwýnhjê pyrã nē Pahihti Jejus mã amnhĩ nhĩpêx mex o apa. Nē mẽ uràk nē amã kaga hkêt kãm axàpênh pix tânopxar o ri apa.

<sup>7</sup> E na pa ã ajahkre anē Ximotre. Tã kêt ka ixte ajahkreja ma nē kãm ajamaxpêr rãhã nē. Koja Pahihti tanhmã akrã hto ka aprĩ hã mar tỳx nē.

<sup>8</sup> Nē kêt ka Pahihti Jejus Kris mã ajamaxpêr rãhã ho ri apa. Na pre katorxà hkôt kêp Pahi finat Tawi kanrêhã htãmnhwý hã mẽ pahpyrà nē ì ho ì nē kato nē panhõ pika kamã pa ho pa. Tã nhũm prem kupĩ nhũm amnhĩ xà htỳx kamã hamak kãm ty. Hãmri nhũm Tĩrtũm akupỹm ho htĩr nhũm akupỹm htĩr o htĩr. Æ na pre hte harênh anhỹr rãhã ho ri mẽ hkôt ixpa.

<sup>9</sup> Mýrapê na prem ijaxà pa arĩ jar ixkrĩ ho ixkrĩ. Na htem ixte amnhĩ tomnuj xwýnh pyrãk o inhĩpêx nē axte ixte Jejus kapêr jarênh o ixpa pymaj ijaxà. Tã ã mẽ kot inhĩpêx anhỹr tã na hte Kris kôt pahtõjaja arĩ ixpãnhã mẽ kãm harênh o ri pa. Koja mẽ tee ri kãm Jejus jarênh o hapêx prãm kapry.

<sup>10</sup> Jakamã kwãr mẽ mãmrĩ ã inhĩpêx anē. Koja mẽ arĩ Jejus kot tanhmã mẽ panê amnhĩ nhĩpêx toja mar o pa nhũm mẽ hkwyjaja hkôt amnhĩ xunhwý nē nhỹrmã pahpyrà nē kêp Jejus Kris kwý hã

Tĩrtũm mẽ wa kuri mex nẽ htĩr tũm nẽ pa ho pa.

*Kris kwỳ kot tanhmã amnhĩ tã grer to hã mẽ harẽnh*

<sup>11</sup> Na pu htem mẽ pahpê Kris kwỳ hã ã amnhĩ tã pagrer anẽ:

Mẽ kot Kris ã mẽ panhĩmex tã kot puj mẽ akupỹm pahtĩr nẽ kuri pamex nẽ pahtĩr tũm nẽ papa ho papa.

<sup>12</sup> Mẽ kot tanhmã Kris ã mẽ pahtomnuj to htã kot puj mẽ arĩ hkõt amnhĩ nhĩpêx o papa rãhã ty nẽ nhỹrmã ãhkô hã mẽ ho amnhĩptar o papa.

Nom kot puj mẽ amnhĩ kamã pakahak pê mẽ pahpê Jejus kwỳ hkêt ã amnhĩ jarẽ hã koja Jejus amnhĩ xwar mẽ pahpê hkwỳ hkêt ã mẽ pajarẽ.

<sup>13</sup> Nẽ mẽ pahte amnhĩ kaxyw Jejus kõt pajamexpêr kêẽ tã tanhmã amnhĩ jarẽnh to xà hkõt tanhmã amnhĩ nhĩpêx to.

Aa kot mẽmoj tã amnhĩ jarẽnh kuhpa hã ri tanhmã amnhĩ nhĩpêx to hkêt. Anẽ.

*Mẽ kot Tĩrtũm kapêr o mẽ ahkre mex xwỳnhjê jarẽnh*

*Wam Pêtre 3.15-16*

<sup>14</sup> E Ximotre. Ixte ã mẽmoj tã amã karõ anhỹrja kêr ka ho mẽ ahkre rãhã ho ri mẽ hkõt apa. Kê mẽ ama nẽ kãm hamaxpêr rãhã nẽ.

Nẽ mẽ kãm anẽ kê mẽ Tĩrtũm kapêr o mẽ ahkre mex o ri pa nẽ kapêr ã tanhmã axpên mã ãkjêr to hkêt nẽ. Koja mẽ hã axpên mã akir hãmri nẽ amnhĩ to mex kêt nẽ. Hãmri nhũm mẽ kot mẽ kapêr mar xwỳnhjaja ja hã mẽ omu nẽ tee ri Tĩrtũm kapêr



kukamã hamaxpër nê hkôt amnhĩ nhĩpêx mex kêt nê.

<sup>15</sup> Nê na htem mẽ kãm mẽ àpênh mex xwýnhjaja mẽ õ patrãw kapër ma nê hkôt mẽmoj tã àpênh mex nê. Nhũm õ patrãwja hwýr mra nê àpênh ã omu. Hãmri nhũm amnhĩ wýr omu nê àmnhĩx noo mã apê. Kãm àpênh mex jakamã amnhĩ kamã kãm uma hkêt nê. Ja pyrã nê kêr ka Tĩrtũm noo mã kãm amnhĩ nhĩpêx mex rãhã nê aprĩ hã kapër o mẽ ahkre mex o ri mẽ hkôt apa. Kê ã ate amnhĩ nhĩpêx anhýr ã apumu nê anhý hã hkĩnh nê. Ka àpênh xwýnhhta pyrã nê amnhĩ kamã amã uma hkêt nê noo mã kãm amnhĩ nhĩpêx mex o ri apa.

<sup>16</sup> No mẽ kot Tĩrtũm kapër o hêx o mẽ pa xwýnhjaja kêr ka mẽ hkôt ri apa hkêt nê. Nê mẽ kapër mar nê ri mẽ hkôt axãm hkêt nê. Na htem mẽ kapër ma nê mẽ hkôt amnhĩ nhĩpêx o pa nê kãm Tĩrtũm kapër mar prãm kêt nê. Nê gaa nê te kêp mar pumaj amnhĩ jamak pro pyrãk o amnhĩ nhĩpêx.

<sup>17</sup> Tỳx ri tanhmã mẽ ahkre hto xàja te kot mẽ hkànhy aa mex kêt nê ra omnuj tỳx o mõrja pyrãk. Jao mẽ kot mẽ kapër mar o mẽ pa xwýnhjaja mẽ mar pê ra mẽ hkôt amnhĩ tomnuj tỳx o mõ. Na hte ra Imẽnew mẽ Pijertija wa ã htỳx ri amnhĩ krã hkôt mẽ ahkre anhýr o pa.

<sup>18</sup> Nê Tĩrtũm o hêx o mẽ hkôt pa nê nhýrmã akupým mẽ pahto mẽ pahtĩr kêt ã harênh o pa. Hãmri nhũm mẽ amnhĩ tã wa kuma nê tee ri amnhĩ kukamã hamaxpër pê Jesus kaga nê axte amnhĩ kaxyw hkôt hamaxpër kêt nê. Nom wa kapërja kot anhýr kêt.

<sup>19</sup> Kêt Tĩrtũm kapërja ãm hãmri na. Kot mẽmoj

to hêx kêt jakamã na pu htem amnhĩ kaxyw hkôt pajamxpêr kaprÿ hkêt nê. Kapêr ã kagà htũm kot tanhmã mẽ pahpê hkrajê jarênh to nê harênh kot: Tĩrtũm na kot hkrajê piitã omunh mex rãhã ho pa xwÿnh.

Anhÿr o mẽ pajarênh. Nê mẽ pamã mẽmoj tã karõ kot:

Kê mẽ kot Jejus kôt amnhĩ xunhwÿr xwÿnhjaja amnhĩ tomnuj o pa hkêt nê. Anê.

*Tĩrtũm krajaja te kêp prat mex pyrãk ã mẽ harênh*

<sup>20</sup> Nê mẽ hikàxpore rũnh xwÿnhjaja mẽ õ xijere nê mẽ õ prat xohtôô. Prat kwÿ muxre nê hkwy omnajre. Prat pynajre na htem mãmrĩ kamã apku no prat muxreja ãm mẽmoj mex pix kaxyw na htem mêsti hã haxwÿ nê kamã apku. Kasamêt ã rÿ mẽ hkra krã hkênh ã mẽ hkĩnh nhũm htem mêsti hã haxwÿ nê kamã apku.

<sup>21</sup> Tã mẽ kot Tĩrtũm kapêr o hêx o mẽ pa xwÿnhjê hkôt hamaxpêr kêt nê mẽ hkôt amnhĩ tomnuj kêt xwÿnhjaja te mẽ kot prat muxre pyrãk. Na htem tãm amnhĩ nhĩpêx nê tanhmã hamaxpêr punuj to ho pa hkêt nê. Hãmri nhũm Tĩrtũm ja hã mẽ omu nê mẽ ÿ hã hkĩnh nê. Hãmri nê te mẽ kot prat muxre jaxwÿr nê kamã apkur pyrã nê mẽ kot kãm tanhmã amnhĩ nhĩpêx to ho pa kaxyw mẽ unhwÿ.

*Mẽ pahte tãm amnhĩ nhĩpêx ã mẽ pamã karõ*

<sup>22</sup> Nê mẽ àptàr nyw jamaxpêr punujja kêr ka te ate hamÿnh nê amnhĩ katut kôt rênh par pyrãk o hipêx Ximotre. Jao axte ho ajamaxpêr o ri apa hkêt nê. Nom mẽ hamaxpêr mexja kêr ka hamÿ nê amnhĩ krã him hagiê nê ho ajamaxpêr rãhã ho ri apa. Jao tãm amnhĩ nhĩpêx nê amnhĩ kaxyw

Tĩrtũm kôt ajamaxpěr rãhã nẽ. Nẽ amã mẽ kęp Kris kôt akwỳjê hkĩnh pê tanhmã mẽ ho ajuta hto ho ri mẽ hkôt apa. Jao mẽmoj to mẽ kutã anojarêt rãhã nẽ. Na hte ã Pahĩti Jejus kôt amnhĩ nhĩpêx xwỳnhjaja amnhĩ nhĩpêx anhỹr o pa.

23 Nẽ kęp ka mẽ kot htỳx ri amnhĩ krã hkôt mẽ ahkre ho mẽ pa xwỳnhjê hkôt apa hkêt nẽ. Te ate mẽ kęp awry hã ri apa pyrã nẽ mẽ kapěr ma nẽ ãm ama. Na htem mẽ kapěr mar o pa nẽ ra hã axpẽn mã tanhmã àkjêr to ho pa. Jakamã kwarĩ mẽ hkôt ri apa hkêt nẽ.

24 Mẽ pahte Tĩrtũm mã amnhĩ nhĩpêx o papa xwỳnhjaja na pu htem mẽ kurom mẽmoj tã axpẽn mã paxàkjêr o ri papa hkêt nẽ. Na pu htem ãm mẽ piitã mẽ kamã paxukapĩrĩ pê mẽ ho mex nẽ mẽ kamã pagryk tokyx anhỹr kêt nẽ. Nẽ Tĩrtũm kapěr o mẽ ahkre mex nẽ. Na hte ã mẽ pahte Tĩrtũm mã tanhmã amnhĩ nhĩpêx to xwỳnhjaja amnhĩ nhĩpêx o papa anẽ.

25-26 Jakamã koja mẽhõ ate Tĩrtũm kapěr o mẽ ahkreja ma nẽ tanhmã ho amã kapěr to ka ama nẽ amnhĩ tã tanhmã kãm akapěr punuj to hkêt nẽ. ãm kamã axukapĩrĩ ho tanhmã hã kãm akapěr mex to. Na hte Satanasti te kot amnhĩm mẽ unênh pyrãk o mẽ hipêx nẽ tanhmã mẽ kãm Tĩrtũm kapěr o hêx to nhũm mẽ kuma nẽ hkôt hamaxpěr nẽ kapěr kôt amnhĩ nhĩpêx. Tã kot kaj mẽ kamã axukapĩrĩ ho mẽ kãm akapěr mex nẽ nhũm Tĩrtũm tanhmã mẽ hkrã hto nhũm mẽ ama nẽ hkôt amnhĩ xunhwỳr japêr. Te Tĩrtũm kot Satanasti pê amnhĩm mẽ utàr pyrãk. Jakamã nhũm mẽ hpãnhã Tĩrtũm kapěr mex ã harẽ nẽ harênh o:

—Nà pěr ãm hãmri na Tĩrtũm kapěrja. ãm mex o mex. Anẽ.

### 3

*Jejus akupỹn wrỳk kukamã mẽ kot amnhĩ tomnuj xwỳnhjẽ jarẽnh*

*Matẽwre 24.4-13; Korosẽ 2.16-19; Wam Ximotre 4.1-5; Sikũn Pẽtre 2.1-3; Jutre 3-16*

<sup>1</sup> Nẽ Jejus akupỹn mẽ pahwỳr wrỳk xwỳj ri mẽ kot tanhmã amnhĩ nhĩpẽx toja kot paj hpãnhã ixprĩ hã amã harẽ ka inhmar tỳx nẽ Ximotre. Kojã Jejus akupỹn mẽ pahwỳr nojarêt pu mẽ pahpê hkwỳjaja pahpunuj nẽ papa.

<sup>2</sup> Nẽ Kris kwỳ hkêt xwỳnhjaja kojã mẽ amnhĩ pix kukamã hamaxpěr o pa.

Jao hikàxpore rax o pikuprõnh pix kukamã hamaxpěr pẽ hkwỳjẽ pẽ õxỳ htỳx o pa.

Nẽ mẽmoj tã amnhĩ to jarkrar o pa.

Nẽ tanhmã hkwỳjẽ japrỳ hto ho pa.

Nẽ mẽ hipẽxà nẽ mẽ katorxà hã hpijaàm kêt o pa.

Nẽ Tĩrtũm ã hpijaàm kêt o pa.

Nhũm mẽhõ tanhmã mẽ ho mex to nhũm mẽ amnhĩ tã mẽ omu nẽ ãm mẽ omu nẽ amnhĩ tã tanhmã mẽ kãm nẽ hkêt nẽ. Rỳ mẽ kãm: “Nà ãm hãmri na ka ã ixto mex anẽ. Nà ja mex.” Anhỳr o mẽ kãm kapěr kêt nẽ.

<sup>3</sup> Mẽ ukaprĩ hkêt jakamã kojã mẽhõ tanhmã mẽ homnuj to nhũm amnhĩ tã mẽ omu nẽ kamã gryk kurê kumrẽx nẽ aa gryk o hapẽx kêt nẽ.

Nẽ amnhĩ tã tanhmã hkwỳjẽ ho hẽx to ho pa.

Nẽ htỳx ri kãm hprãm xà hkôt tanhmã amnhĩ tomnuj to.

Ně oprê ho pijapu pix kukamã hamaxpêr.  
Ně axtem ně kãm mějmoj mex pumunh prãm rý  
mějmoj mex mar prãm kêt ně.

<sup>4</sup> Ně mějho ho hkràmnhwý htã axtem ně mẽ kãm  
měj hkurê xwýnhjê nhĩhkram haxà.

Ně hamaxpêr mex kêt o tanhmã amnhĩ tomnuj  
to rãhã ho ri pa.

Ně amnhĩ to rũnh o mẽ piitã mẽ hakrenh par ã  
amnhĩ to jarkrar o ri pa.

Ně amnhĩ krã hkôt kãm amnhĩ nhĩpêx prãm xà  
hkôt amnhĩ nhĩpêx o pa ně kãm Tĩrtũm kãm  
prãm xà hkôt amnhĩ nhĩpêx prãm kêt ně.

<sup>5</sup> Hãmri ně mẽ kêp hkra hã amnhĩ jarênh o pa  
htã aa hkôt amnhĩ nhĩpêx kêt. ã Tĩrtũm kra hkêt  
xwýnhjaja amnhĩ nhĩpêx kot anhýr jakamã kwa kêr  
ka ã mẽ hkôt apa hkêt ně Ximotre.

<sup>6-7</sup> Na htem hêx rom hkwýjê nhõrkwý hwýr agjê  
ně kamã tanhmã mênijê mã hêx to. Měj kot mẽ mar  
ně tanhmã amnhĩ tomnuj to hãmri ně ja hã amnhĩ  
pumu ně tee ri amnhĩ kukamã hamaxpêr kaxyw.  
Ně mẽ kãm mẽ kapêr nyw mar prãm tã nhãm mẽ  
kapêr ma ně nhãm mẽ kapêr mar ně aa Tĩrtũm  
kapêr mar ně amnhĩ kaxyw hkôt hamaxpêr kêt  
ně. Jakamã nhũm mẽ kot amnhĩ tomnuj xwýnhjaja  
hêx rom mẽ hwýr mra ně mẽ õrkwý hwýr agjê ně  
tanhmã mẽ kãm mějmoj to hêx to.

<sup>8</sup> Te kot amnepêm finat Jãnre mẽ finat Jãmtija wa  
kot amnhĩ nhĩpêxta pyræk. Na pre finat Mojestija  
Tĩrtũm nhỹ hã tanhmã mẽ ahkre hto ho pa nhũm  
Jãnre mẽ Jãmti wa kãm mar prãm kêt ně. Něj  
tanhmã ja nê hkwýjê mã kapêr to ho pa. Tã ã  
mě kot amnhĩ tomnuj anhýr o mẽ pa xwýnhjaja

na htem wa uràk nē kām Tīrtūm kapēr mar prām kêt nē kapēr nē tanhmā hkwỳjê mǎ kapēr to ho pa. Nhūm mē hamaxpēr mex kêt jakamā ãm mēmoj punuj pix kukamā hamaxpēr nē mē kuma nē amnhī kaxyw Jejus kôt hamaxpēr kêt nē.

<sup>9</sup> Tã nom koja mē hkwỳjaja tokyx hprī hã mē kot mēmoj to hêx ã mē omu hãmri nē axte mē hkôt hamaxpēr kêt nē nhūm mē rī amnhī pumu. Te amnepēm mē kot hprī hã Jãnre mē Jãmti wa kot tanhmā amnhī tomnuj to hã wa omunhta pyràk.

*Mē pahte Jejus ã pahpunuj tã hkaga hkêt ã mē pamã karõ*

*Atre 13.50-14.7, 14.19-22*

<sup>10</sup> E Ximotre. Ate ixkôt apa ryy jakamā ra ate tanhmā ixte amnhī nhīpêx ho ixpa hã ixpumunh mex.

Ixte tanhmā Tīrtūm kapēr o mē ahkre hto ho ixpaja.

Nē inhmā mēmoj to anhÿr prām xwỳnhja.

Nē ixte amnhī kaxyw Kris kôt ijamaxpěrja.

Nē inhgryk tokyx anhÿr kêtja.

Nē ixte tanhmā Kris kôt ixkwỳjê ho mex to ho ri ixpaja.

Nē ixpunuj nē ixpa htã arī Kris kôt amnhī nhīpêx mex o ixpaja.

Ã ixte amnhī nhīpêx anhÿr o ixpaja ate ixpumunh mex.

<sup>11</sup> Na pa pre krī pê ãxiok nē Ikõn nē Ristija kamã mē kām Jejus jarēnh o ixpa nhūm mē hkwỳjaja Jejus ã tanhmā inhīpêx to pa amnhī xà htỳx kamã ijamak o ri mē hkôt ixpa. Tã nhūm Pahihti Kris xatã mē kêp ixpytà pa ixtīr pê mē ïhkra rūm ijapôx o ixpa.

12 Na hte Kris kwỳ hkêt xwỳnhjaja mẽ pahte Kris kôt amnhĩ nhĩpêx o papa hã mẽ pahtomnuj o pa.

13 Nẽ mẽ kot Tĩrtũm kapêr o hêx o mẽ pa xwỳnhjaja koja arĩ mẽ kêp Kris kwỳ hã amnhĩ to hêx pẽ mẽ nokupyr. Nẽ mẽ kãm Tĩrtũm kapêr o hêx o pa. Jao ra mẽ tãmjaja amnhĩ nokupyr o pa nẽ amnhĩ tomnuj tỳx kumrêx.

*Pawre kot tanhmã Tĩrtũm kapêr ã kagà jarênh to Rômãn 15.4; Sikūn Pêtre 1.19-21*

14-15 No ka Ximotre. Amnepêm aprĩre rũm na pa pre mẽ ixohtô nẽ Tĩrtũm kapêr o ajahkre ho ixpa. Akatorxà nẽ anhõ wôwôre nẽ pa nẽ Kris kwỳjaja pa prem ho ajahkre rãhã ho akôt ixpa ka mẽ inhmar tỳx nẽ amnhĩ kaxyw Jejus kôt ajamaxpêr. Jakamã kwa kêr ka arĩ hkôt ajamaxpêr mex rãhã ho ri apa. Tĩrtũm kapêrja na htem mar pẽ amnhĩ kaxyw Jejus Kris kôt hamaxpêr nẽ hkôt amnhĩ xunhwỳ nhũm Tĩrtũm ja hã mẽ omunh xà hkôt mẽ ho hkra.

16 Tĩrtũm kapêr ã kagàja Tĩrtũm kapêr na. Na htem ho mẽ ahkre ho pa. Koja mẽhõ hkwỳm ri tanhmã amnhĩ tomnuj to nẽ kapêr ma nẽ tee ri amnhĩ tomnujja kukamã hamaxpêr o ra hkaprĩ nẽ. Rỳ tanhmã amnhĩ tomnuj to htã kapêr ã kagà kamã kapêr nẽ Tĩrtũm kot ã kot amnhĩ tomnuj anhỹrja nẽ mẽ pamã kapêr ã harênh ma nẽ amnhĩ tomnujta kaga kurê kumrêx. Rỳ kamã kapêr nẽ Tĩrtũm kot tanhmã mẽ pahte amnhĩ to mex to hã mẽ pamã karõ kamã harẽ nẽ kuma. Hãmri nẽ y hã hkôt amnhĩ nhĩpêx mex rãhã nẽ. Æ na hte Tĩrtũm kapêr kagàja mẽ kot mar nẽ hkôt amnhĩ nhĩpêx xwỳnhjê ho mex anẽ.

17 Na hte mẽ kot Tĩrtũm mã amnhĩ nhĩpêx o mẽ pa xwỳnhjaja kamã harẽ nẽ hkôt amnhĩ nhĩpêx mex pẽ mẽ piitã mẽ ho mex nẽ ho mẽ ahkre mex rãhã ho pa.

## 4

### *Pawre kot mẽmoj tã Ximotre mã karõ*

#### *Korosẽ 4.5-6*

<sup>1</sup> Nẽ koja nhỹrmã Jejus Krisja akupỹn mẽ pahwỳr wrỳ hãmri nẽ mẽ pahpiitã tanhmã mẽ pajarẽnh to. Ra mẽ htyk xwỳnhjaja nẽ arĩ mẽ pahtĩr xwỳnhjaja nhũm tanhmã mẽ pahte amnhĩ nhĩpêx to ho papa hã mẽ pahpumunh kôt tanhmã mẽ pajarẽnh to. Jao Tĩrtũm mẽ wa kuri mẽ pahtĩr tũm nẽ papa ho papa hã mẽ pajarẽ rỳ wa kuri pahtĩr tũm nẽ papa hkêt ã mẽ pajarẽ. Jakamã kwa Ximotre kot paj Tĩrtũm mẽ Jejus Krisja wa noo mã mẽmoj tã amã karõ ka inhmar tỳx nẽ.

<sup>2-4</sup> Kojã nhỹrmã mẽ kêp Tĩrtũm kra hkêt xwỳnhjaja axte kãm Tĩrtũm kapêr mar prãm kêt nẽ nhãm mẽ kapêr pix mar prãm o ri pa. Jao amnhĩ kukamã hamaxpêr o:

—Nà inhmã Tĩrtũm kapêr mar prãm kêt. Kot mẽmoj piitã nê mẽ hkurê kênã. Kot paj hpãnhã mẽhõ kot mẽmoj nê mẽ hkurê hkêt xwỳnhjê kapêr pix mar o ri ixpa. Nà kot paj anê. Ja na inhmã hprãm. Nom kot paj axte Tĩrtũm kapêr mar kêt nẽ.

Anhỹr jao kapêr kaga nẽ hpãnhã htỳx ri nhãm mẽ ujarẽnh pix ma nẽ hkôt hamaxpêr. Kojã mẽ ã amnhĩ nhĩpêx anhỹr o pa. Jakamã kwa kêr ka arĩ mẽ kãm Jejus kot tanhmã mẽ panê amnhĩ nhĩpêx to hã harẽnh rãhã ho ri mẽ hkôt apa Ximotre. Mẽ kãm mar prãm kêt tã mãmri ri mẽ kãm harẽ.



Ně nhÿri mēhō pumu ně kām harē. Mē kām mar prām xwÿnhjê mǎ harē ně mē kām mar prām kêt xwÿnhjaja ka mǎänēn mē kām harē. Nhūm mēhō tanhmā amnhī tomnuj to ka hā omu ně tanhmā ně kām akapēr to kê hkaga tokyx anē ně akupÿm tām amnhī nhīpêx. Rÿ nhūm mēhō tām amnhī nhīpêx o pa ka ja hā omu ně hā kām akapēr ně kām:

—Ăm hāmri na ka hte Tirtūm kôt amnhī nhīpêx mex ně. Anē.

Hāmri ně anojarêt kêt kām mē kām Tirtūm kapēr o mē ahkre rāhā ho ri apa.

<sup>5</sup> Nē tām ri amnhī nhīpêx rāhā ně. Mē kot Jejus ā tanhmā anhīpêx to htā kêr ka ŷ hā amnhī to htÿx ně arī mē kām kapēr jarēnh o ri mē hkôt apa. Jao Tirtūm mǎ amnhī nhīpêx mex rāhā ně. Kêr ka ā mē hkôt amnhī nhīpêx anhÿr o ri apa Ximotre.

*Pawre kot ra htyk kaxyw ā amnhī jarēnh  
Atre 20.17-35*

<sup>6</sup> Nē mē kot ixpīr xà hā arīgroja ra hwÿr ahtêp o mō. Kot paj pēr tokyx ty. Amnepēm na prem Tirtūm mǎ mēmoj nhōr kaxyw ně mē hkōm xà kamā mēmo kagôja py ně mē kot Tirtūm mǎ mēmoj nhōr xà hā mēstija ā hkapīr pa nhūm hapêx. Tā te ixpê mē hkōm xà kamā mēmo kagô pikapīrta pyrāk. Kot paj tokyx ty ně jar ijpêx.

<sup>7</sup> Na pa ra Pahihti Jejus mǎ amnhī nhīpêx mex o ri ixpa. Mē kot tanhmā hā ixtomnuj to htā pa hkaga hkêt ně arī hkôt amnhī nhīpêx mex rāhā ra ixyk kaxyw.

<sup>8</sup> Ixte Pahihti kām hprām xà hkôt amnhī nhīpêx mex o ri ixpa jakamā koja amnhī tǎ tanhmā ixto mex to. Nom papxipix ixto mex kêt ně. Na hte

ãm hãmri tãm mẽ pahpiitã mẽ panhĩpêx. Jakamã nhỹrmã kot mẽ piitã tanhmã mẽ harênh to xà hã arĩgrota ã koja mẽ pahkĩnh pê mẽ pahte amnhĩ wỳr kamã pajamak o papa xwỳnh piitã mẽ pamã mã mẽmoj mex gõ.

*Pawre kot amnhĩ wỳr Ximotre hwỳr*

<sup>9</sup> Kwa na pa ra ato ijamak tỳx nẽ Ximotre. Kwa kêr ka amnhĩm anojarêr nẽ tokyx tanhmã amnhĩ to hpa nẽ man ixwỳr mõ.

<sup>10</sup> Na pre ra Kresêx ma Karatas wỳr mõ nhũm Xitre ma pika pê Tawmas wỳr mõ. Nhũm Tẽmti ra tanhmã hamaxpêr to nẽ àpênh gryk ã ixkaga nẽ ma akupỹm Tesarõn wỳr mõ.

<sup>11</sup> ãm Rukre pix na arĩ ixkõt pa jakamã kêr ka anojarêr hãmri nẽ ahte amõr kêr nẽ. Makre mã anẽ kê man akõt ixwỳr mõ nẽ tanhmã ixto ajuta hto ho pa.

<sup>12</sup> Nẽ Xikitre na pa pre ra Epes wỳr kumẽ.

<sup>13</sup> Nẽ Torõt kãm Kapti nhõrkwỹ kamã ixte kry pê inhõ kamĩs pa hkà ryti rer jakamã kêr ka anojarêr nẽ inhmã apy nẽ man inhmã o mõ. Nẽ inhõ kagàta ka mããnẽn inhmã amỳ nẽ o mõ. Nẽ mẽmo mry kà hã ixte mẽmoj tã kagàta ka mããnẽn apy nẽ mãn inhmã o mõ. E kêr ka anojarêr nẽ ixkukrêxja jamỳ nẽ ixwỳr ho mõ.

*Tanhmã Aresãnti kot Pawre nhĩpêx to hã harênh*

<sup>14-15</sup> Nẽ na pre kàx o mẽmoj nhĩpêx xwỳnh Aresãntija ixtomnuj nẽ. Pa pre mẽ kãm Tĩrtũm kapêr o mẽ ahkre ho ri mẽ hkõt ixpa nhũm tee ri inhma nẽ kãm mar prãm kêr nẽ. Hãmri nẽ ixkutã amnhĩ xãm nẽ inhĩpêx kati nẽ. Nom koja Pahihti

Jejus ixtã tanhmã ho. Kwa kêr ka amnhĩ nê omunh mex nê Ximotre.

*Pahihti Jejus kot Pawre mã hamaxpêr o hihtỳx ã harênh*

<sup>16</sup> Nê pahi kot mẽ mar xà hã ixkre kamã wam ixte mẽ kãm amnhĩ jarênhta ã na pre mēhõ ixyr pê mẽ kãm tanhmã ijarênh to hkêt nê. Na prem piitã mẽ umaj ixkaga hpa. Nom kwār mẽ māmri ã amnhĩ nhĩpêx anê. Tĩrtũm kot ixtã tanhmã mẽ hoja na inhmã hprãm kêt.

<sup>17</sup> ãm Pahihti Jejusja pix na pre mẽ kurom ixkaga hkêt nê. Na pre ixto ixihtỳx nê pa ỳ hã mẽ kãm tanhmã mẽ panê kot amnhĩ nhĩpêx to hã harênh pa. Nhũm Ijaew kêt xwỳnh kot inhmar o hkrĩ xwỳnhjaja ixujarênh mar o hkrĩ nhũm Tĩrtũm inhnê tanhmã mẽ ho nhũm mẽ ixpĩr kêt nê.

<sup>18</sup> Koja Pahihti mẽ kutã ixto ixihtỳx rãhã nê mẽmo arĩgro hã amnhĩ wỳr ixto api. Pa Tĩrtũm mẽ wa kuri inhmex kumrêx nê ixtĩr tũm nê ixpa ho ixpa. Pahihti mex o mex jakamã kêr pu mẽ kãm mex o mex ã harênh rãhã ho papa nê aa jam panhũrer kêt nê.

*Pawre kot tanhmã hkràmnhwỳjê jarênh to*

<sup>19</sup> Nê kêr ka Prisire mẽ mjên Akir wa kãm ijarê. Nê Onēsipti hprõ nê hkrajaja ka mãânên mẽ kãm ijarê.

<sup>20</sup> No Eras kormã Korĩt kãm pa. Nê Toropti na pre à nê pa Mĩrêt kãm kure nhũm ixkôt mõi kêt nê.

<sup>21</sup> Kwa kêr ka amnhĩm anojarêt nê amgrà pê man tokyx ixwỳr mõi Ximotre.

Ně ota Epti mẽ Prutěhti mẽ Rĩnre mẽ Krawreja awỳr hpěr mẽ. Ně jar Kris kôt pahkwỳjê piitã awỳr hpěr mẽ.

<sup>22</sup> E kê Pahihti Jejus ato mex rãhã ně mẽ apiitã mẽ akutã nojarêt rãhã ho pa.

Tã ãm ja pix. Ixpê Pawre na pa awỳr kagàja nhĩpêx ně kumě.

**Tĩrtũm kapēr ã kagà nyw**  
**New Testament in Apinayé (BR:apn:Apinayé)**

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

**Copyright Information**

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Apinayé

**© 1999, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

PDF generated using Haiola and XeLaTeX on 18 Apr 2025 from source files  
dated 29 Jan 2022

383a4e22-34cd-505f-9cc2-2f9921e7aa9f